

Nijaat Paane Kā Āsaan Tareeqā

Injeel : Yuhannā 3:1-21

Janaab Nikodimus naam ke ek Yahudī ādmī the jo Fareesī kahalaate the. *[Fareesī log Musā^(a.s) ke qaanun par saḥṭī se amal karte the.]* Janaab Nikodimus Yahudiyoṅ ke ek ḳḥaas rahanumā the. ⁽¹⁾ Ek raat janaab Nikodimus Īsā^(a.s) ke paas āe aur kahā, “Ustaad, ham jaante haiṅ ki āp Allaah taa’alā ke bheje hue ek ustaad haiṅ. Āp wo karishmā karte haiṅ jo koī bhī naheen kar saktā jab tak ki Allaah rabbul azeem us ādmī ke saath nā ho.” ⁽²⁾

Īsā^(a.s) ne unheṅ jawaab diyā, “Yaqeenan, maiṅ tumko āj ek haqeeqat bataatā huṅ. Jab tak tum phir se upar se paidā ho kar naheen āoge, tab tak Allaah taa’alā kī saltanat me naheen ā paaoge.” ⁽³⁾ Janaab Nikodimus ne kahā, “Jo ādmī buḡhā ho chukā hai, wo kaise dubaarā paidā ho saktā hai? Wo apnī maaṅ ke jism me waapas naheen jā saktā, to phir wo dubaarā kaise paidā ho saktā hai?” ⁽⁴⁾ Is baat par Īsā^(a.s) ne jawaab diyā, “Yaqeenan, maiṅ tumko ek sacchaaī bataatā huṅ, jab tak tum paanī aur ruh se paidā naheen kare jaaoge, tab tak tum Allaah taa’alā kī saltanat me naheen jā paaoge. ^[a] ⁽⁵⁾ Jo bhī ek jism me paidā huā hai wo jism hī hai aur jo ruh se paidā huā hai wo ruh hai. ⁽⁶⁾ Agar maiṅ tumse ye kahūṅ to hairaan nā honā, ‘Tumko Allaah taa’alā kī taraf se dubaarā paidā honā hai.’ ⁽⁷⁾ Hawā jahaan chaahtī hai wahaan chalī jaatī hai. Tum hawā ke chalne kī āwaaz sunte ho magar tumko ye naheen patā ki wo kahaan se ātī hai aur kahaan jaatī hai. Ye qudrat us insaan ke paas bhī hai jo ruh se paidā huā hai.” ⁽⁸⁾

Janaab Nikodimus ne puchā, “Ye sab kaise ho saktā hai?” ⁽⁹⁾

To Īsā^(a.s) ne unse kahā, “Tum ek ḳḥaas ustaad ho tum ye sab baateṅ kyuṅ naheen samajhte ho?” ⁽¹⁰⁾ Maiṅ tumko ek haqeeqat bataatā huṅ. Ham sirf us baare me baat karte haiṅ jiske baare me hameṅ purī tarah se patā hai. Ham us baare me baat karte haiṅ jo hamne ḳḥud dekhī hai, lekin phir bhī tum merī gawaahī par yaqeen naheen kar rahe ho. ⁽¹¹⁾ Jab maine tumko zameen par hone waalī sacchaaī ke baare me bataayā to tumne uspar yaqeen naheen kiyā to phir agar maiṅ tumko jannat ke baare me bataauḡā to tum usko kaise maanoge! ⁽¹²⁾ Koī bhī jannat tak naheen pahunchā, sirf Ādmī Ke Beṭe, jo wahaan se neeche āyā hai. ⁽¹³⁾

“Tumko yaad hai ki kis tarah Musā^(a.s) ne registaan me saamṡ ko upar uṭṭhaayā thā. Usī tarah se, Ādmī Ke Beṭe ko bhī upar uṭṭhaanā hogā. ⁽¹⁴⁾ Taaki jo bhī us par yaqeen kareṅ usko kabhī nā ḳḥatm hone waalī zindagī mile. ⁽¹⁵⁾ Allaah rabbul kareem is duniyā se itnā pyaar kartā hai ki usne apnā chunā huā numaaīndā bhejā, taaki jo bhī us par īmaan laaeṅ aur tabaah hone se bach jae aur unko kabhī nā ḳḥatm hone waalī zindagī mile. ⁽¹⁶⁾

“Allaah taa’alā ne unko is duniyā me faislā karne ke liye naheen bhejā hai. Balki islie bhejā ke duniyā ke log unke zariye se sukun aur nijaat pā sakeṅ. ⁽¹⁷⁾ Har ek ko sazā se bachā liyā jaaegā jo us par īmaan laaegā. Un logoṅ ko sazā milegī jo us par īmaan naheen laae haiṅ kyuṅki un logoṅ ne Allaah taa’alā ke chune hue numaaīnde par yaqeen naheen kiyā. ⁽¹⁸⁾ Isī wajah se unko pahale se hī ye sazā sunā dī hai: Allaah taa’alā kā nur duniyā me ā chukā hai, lekin log raushnī se zyaadā andhere ko pasaṅd karte haiṅ kyuṅki wo gunaah waale kaam karte haiṅ. ⁽¹⁹⁾ Jo bhī gunaah kartā hai wo raushnī se dur bhaagtā. Wo roshnī me islie naheen ānā chaahte kyuṅki unko ḡar rahtā hai ki kaheen unke gunaah saamne nā ā jaeṅ. ⁽²⁰⁾ Lekin jo bhī sahī raaste par chaltā hai wo raushnī me ā jaatā hai aur dekh letā hai kī unhone jo bhī kaam kie the wo Allaah taa’alā ke liye the.” ⁽²¹⁾

Saamṡ Ke Azaab Kā Waaqyā

Taurait : Giṅtī 21:4-9

[Kaafī sadiyoṅ pahale, Musā^(a.s) kī nabeeyat ke zamaane me] saare Ibraanī Hor ke pahaad ke paas kī jagah ko chod kar Akaabā kī khaadī me chale gae jo Bahar-e-Kulzum ke paas me thī. Unhone aisā islie kiyā taaki wo mulk Adom ke baahar se ghum kar jaeṅ. Lekin raaste me unke saath ke logoṅ ne apnā sabr kho diyā aur ⁽⁴⁾ Musā^(a.s) aur Allaah taa’alā ke ḳḥilaaf ultī-seedhī baateṅ karne lage. Wo log kahne lage, “Tum hameṅ Misr se baahar nikaal kar kyuṅ laae ho? Ham registaan me mar jaeṅge! Hamaare paas khaane ke liye rotī bhī naheen hai! Peene ke liye paanī bhī naheen hai! Aur ham se ye bekaar ^[b] khaanā khaayā naheen jaatā.” ⁽⁵⁾

Tab Allaah taa’alā ne unpar saamṡpoṅ kā azaab bhejā. Un saamṡpoṅ ne logoṅ ko kaatṅā shuru kiyā jis se bahut se Ibraanī mar gae. ⁽⁶⁾ Log Musā^(a.s) ke paas āe aur kahā, “Hamne āpke aur Allaah taa’alā ke baare me ultī-seedhī baateṅ kar ke gunaah kiyā hai. Āp Allaah taa’alā se duā karie ki ye saamṡ chale jaeṅ.” To Musā^(a.s) ne logoṅ ke liye duā karī. ⁽⁷⁾

Allaah taa'alā ne Musā^(a.s) se kahā, “Ek peetal kā saam̐ banaao aur usko ek ḡaṇḡe par lagaao. Jisko bhī saam̐ ne kaatā hogā agar wo isko dekhegā to wo zindā bach jaaegā.”⁽⁸⁾ To Musā^(a.s) ne peetal kā ek saam̐ banaayā aur usko ek khambe par lagaayā. Tab jisko bhī saam̐ kaat letā thā wo usko dekh kar zindā bach jaatā thā.⁽⁹⁾

[a] Injeel : Mattā 3:11 Me, Yaahyā^(a.s) ne kahā, “[Main] paanī me ḡusl de kar paak kartā huṇ, lekin mere baad [jo] āegā [wo] logon ko Allaah taa'alā kī ruh aur āḡ se paak karegā.”

[b] Allaah taa'alā ne unko khaane ke liye mann naamak ek āsmaanī rotī aur salwā diyā jo āsmaan se unke liye roz ātā thā. (Quraan majeed : Al-baqarah 2:57, Taurait : Hijrat 16)